

POPERA GA EPÉCHIUWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgūxŭ ga Epéchiuarü iānewa yexmagūxŭ

¹ Pa Chaueneēgŭ ya Epéchiuwa Ngēxmagūxe, choma i Pauru nixŭ i pexcèx chanaxūmatūxŭ i ñāñ popera. Rü choma i Pauru chixŭ i Tupana choxŭ yaxuxŭ na Ngechuchu ya Cristu choxŭ muxcèx na duŭxŭgūmaā nüxŭ chixuxūcèx i norü ore. Rü pexcèx chanaxūmatü i guxāma i pema ya Epéchiuarü iānewa ngēxmagūxe rü Tupanaārü duŭxŭgŭ ixīgūxe rü Ngechuchu ya Cristuaxŭ yaxōgūxe.

² Rü chanaxwèxe i pexŭ narüngŭxēē rü pexŭ nataāēxēē ya Tanatü ya Tupana rü tórü Cori ya Ngechuchu ya Cristu.

Tupana rü poraācü tūxŭ narüngŭxēē erü Cristuarü duŭxŭgŭ tixīgŭ

³ Rü name nixŭ i nüxŭ ticuèxŭgŭ ya Tanatü ya Tupana ya tórü Cori ya Ngechuchu ya Cristu-natü ixïcü. Erü nüma ya Tupana rü Cristugagu tūxna nanaxā i naguxŭraūxŭ i ngŭxēēgŭ i üünexŭ i dauxŭguxŭ i naanewa taxcèx ne namugūxŭ.

⁴⁻⁵ Rü tautama naāne ūxgu, rü Cristugagu Tupana tūxŭ nade na napēxewa ixüünegūxūcèx rü na nataxuxūcèx i tórü chixexŭ i napēxewa. Rü

Tupana rü poraãcü tüxü nangechaũ. Rü yemacèx nuxcümamatama tüxü naxuneta na naxãcügüxü tüxü nadexücèx Ngechuchugagu. Rü yemaãcü nanaxü yerü yema nixĩ ga norü ngúchaũ.

⁶ Rü ngêmacèx name nixĩ i guxüguma nüxü ticuèxüŕgü ya Tupana. Erü nüma rü poraãcüxüchima tamaã namecüma rü poraãcü tüxü narüngüxêe ga yexguma taxcèx núma namuãxgu ga Nane ya nüxü nangechaũxüchicü.

⁷ Rü Tupana rü poraãcü tüxü nangechaũ, rü yemacèx nanamu ga Nane na taxcèx nayuxü rü nagü inabaxü na yemaãcü tüxü ínanguxüxêeücèx rü tüxü nüxü nangechaũxücèx ga tórü pecadugü.

⁸ Rü Tupana tüxü nüxü nadauxêe na ñuxãcü poraãcü tüxü nangechaũxü ga yexguma tüxna naxããxgu ga guxüma ga tórü cuèx na taãxü icuáxücèx rü tüxü natauxchaxücèx i norü ore.

⁹ Rü tüxü nüxü nacuèxêe ga norü ngúchaũ ga noxri nüxĩcatama nüxü nacuáxü. Rü yema norü ngúchaũ ga nuxcümamaxüchima Cristumaã nagu naxĩnüxü ga Tupana, rü yema nixĩ ga ñoma ga naãnewa na namuãxü na tüxü yamaxêxêxücèx.

¹⁰ Rü yema nagu naxĩnüxü nixĩ na Cristumêxêwa nangêxmaxêeãxü i guxüma i daxüguxü i naãnewa ngêxmaxü rü guxüma i ñoma i naãnewa ngêxmaxü. Rü ngêmaãcü tá nanaxü ya Tupana i ngêxguma nawa nanguxgu na yanguxêeãxü.

¹¹ Yerü naxüpa ga ñoma ga naane naxüxü ga Tupana, rü woetama tomaã nanaxuegu na Cristugagu tanayauxgüxücèx i ngêma maxü i taguma gúxü i nüma toxna naxãxchaũxü na aixcüma naxcèx tamaxêxücèx. Rü aixcüma yemaãcü nanaxü yerü yema nixĩ ga norü ngúchaũ

ga Tupana ya guxūma ücü, ngēma nūma nagu naxīnūxūācūma.

¹² Rū yemaācü Tupana tomaā nanaxuegu na toma i toxira Cristuaxū yaxōgūxe naxcèx tamaxēxūcèx rü nūxū ticuèxūūgūxūcèx naxcèx i norū pora i üünexū.

¹³ Rū yexgumarū ta ga pema i Epéchiucūāxgū, rü yexguma nūxū pexīnūēgu ga yema ore i aixcūma ixīxū i tūxū maxēxēēxū, rü yexguma Cristuaxū peyaxōgūgu, rü namücūgū pixīgū. Rū Tupana ga tamaā ixunetacū na tūxna namuāxūcèx i Naāē i Üünexū, rü marū pexna nanamu i ngēma Naāē na nūxū pecuáxūcèx na aixcūma norū duūxūgū pixīgūxū.

¹⁴ Rū ngema Naāē i Üünexū ga Tupana tūxna muxū, rü ngemaawa nixī i nūxū icuáxū na aixcūma Tupana tá tūxna naxāxū i guxūma i ngema tamaā inaxunetaxū. Rū ngēxguma wena nūma naxūxgu ya Cristu na nūgūxūtawa tūxū nagagūxūcèx rü aixcūma tá tanayaxu i guxūma i ngema Tupana tomaā nūxū ixuxū. Rū ngēmacèx name nixī na nūxū icuèxūūgūxū ya Tanatū ya Tupana ya üxūnecū.

Pauru rü yaxōgūxūcèx nayumūxē.

¹⁵⁻¹⁶ Rū ngēmacèx, ñuxma na nūxū chacuáxū na aixcūma tórū Cori ya Ngechuchuaxū peyaxōgūxū rü na aixcūma nūxū pengechaūgūxū i guxūma i ngēma togū i Tupanaārū ixīgūxū, rü ngēmacèx taguma nūxū charūchau na pexcèx moxē nūxna chaxāxū rü pexna chacuèxāchixū i chorū yumūxēwa.

17 Rū ngēxguma namaã chideaxgu ya Tanatü ya Tupana ya mexēchicü ya Nanatü ya tórü Cori ya Ngechuchu ya Cristu, rü naxcèx nüxna chaca na pexna naxããxücèx i ngēma cuèx i Naãē i Ūünexüwa ne üxü. Rū ngēma Naãē i Ūünexü tá nixĩ i pexcèx nangoxēēxü i Tupanaärü ore i mexü na yexeraãcü nüxü pecuáxücèx ya Tupana.

18 Rū Tupanana naxcèx chaca na nümatama pexü yangoxnaãēxēēxücèx, na nüxü pecuáxücèx na tacü yĩxü i ngēma ípenanguxēēxü i naxcèx pexü nadexü. Rū nüxna naxcèx chaca na pexü nüxü nacuèxēēxücèx na ñuxãcü namexēchixü i ngēma maxü i taguma gúxü i nüma norü duüxügücèx namexēēxü i daxüguxü i naãnewa.

19-20 Rū ngēxgumarüü ta rü nüxna naxcèx chaca na pexü nüxü nacuèxēēxücèx na ñuxãcü nataxüchixü i norü pora i tawa ngēxmaxü rü namaã tüxü nangüxēēxü i yixema na yaxögüxü. Rū ngēmatama pora i taxümaã nixĩ ga napuracüxü ga Tupana ga yexguma yuwa Cristuxü ínadxēēgu rü daxüguxü ga naãnewa nagaãxgu rü nügüarü tügü necüwawa yanatoxēēãgu na guxãärü ãëxgacü yĩxücèx.

21 Rū yemaãcü guxüetüwa nanayexmaxēē. Rū ngēmacèx i ñuxma rü Cristumēxēwa nangēxmagü i guxüma i daxüguxü i naãnecüãx i ãëxgacügü rü guxüma i ñoma i naãnecüãx i ãëxgacügü. Rū ngēmaãcü naxmēxwa nangēxmagü i guxüma i pora i ñuxma ngēxmagüxü rü guxüma i pora i tá ngēxmagüxü. Rū ngēmaãcü i nüma rü guxü i ãëxgacügüarü ãëxgacü tá nixĩ i guxüguma.

22 Rū yemaãcü ga Tupana rü marü

Cristuměxěwa nanayexmagüxěẽ ga guxũma. Rũ yexgumarũũ ta Cristuxũ ningucuchixěẽ na guxũma i yaxõgüxũẽru na yĩxũcèx.

²³ Rũ ñuxma rũ guxũma i yaxõgüxũ rũ wũxigu Cristuarũ nixĩgũ. Rũ nüma nixĩ i tawa nangẽxmaxũ i guxãma i yixema i nüxũ na yaxõgüxũ. Rũ ngẽxgumarũũ ta nüma nixĩ i nangẽxmaxẽẽãxũ i guxũma i tacü i ngẽxmaxũ i guxũwama.

2

Tamaxẽ erũ Tupana tüxũ nangechaũ

¹ Rũ ũpa ga pema rũ perũ pecadugagu rũ perũ chixexũgagu ñoma peyuxũrũũ pixĩgũ.

² Yerũ ga pema rũ nagu pexĩ ga yema chixexũ i ñoma i naãnecũãx i duũxũgũ nagu ĩxũ. Rũ pema rũ naga pexĩnũẽ ga Chataná i ngoxogũarũ aẽxgacũ ixĩxũ. Rũ nüma nixĩ i nüxũ nangũchaũxẽẽãxũ na chixexũ naxügüxũcèx i guxũma i ngẽma duũxũgũ i tama Tupanaga ĩnüẽxũ.

³ Rũ guxãma ga yixema rũ yemaãcü chixri tamaxẽ ga ũpa. Rũ tanaxü ga tóxrütama ngũchaũ, rũ nagu taxĩ ga yema taxüne naxwèxexũ rũ yema taãẽ naxwèxexũ. Rũ yemagagu yema togũ ga duũxũgũ ga chixexũ ügüxũrũũ nawa taxügũ i ngẽma poxcu i aũcũmaxũchixũ i Tupana mexẽẽxũ.

⁴ Natürũ ga Tupana rũ poraãcü nüxũ tangechaũtümũgũ rũ poraãcü tüxũ nangechaũ.

⁵ Rũ yemacèx, woo tórũ pecadugagu ñoma iyuxũrũũ tixĩgũ, natürũ ga Tupana rũ tüxna nanaxã ga maxũ ga yexguma Cristuxũ ĩnadaxẽẽgu. Rũ ñuxma rũ pexũ nangẽxma i maxũ i taguma gũxũ, erũ Tupana pemaã namecũma.

⁶ Rū yema na Ngechuchu ya Cristuxŭ wena namaxēxŭrŭŭ rŭ tŭxŭ rŭ ta namaxēxēē ga Tupana. Rū yemaācŭ nanaxŭ na yixema rŭ ta Cristumŭcŭgŭ ixŭgŭxŭcèx, rŭ namaā āēxgacŭgŭ ixŭgŭxŭcèx i daxŭguxŭ i naānewa.

⁷ Rū yemaācŭ nanaxŭ ga Tupana na guxŭgutáma duŭxŭgŭxŭ nawéaxŭcèx na ñuxācŭ Cristugagu poraācŭ tŭxŭ nangechaŭxŭ rŭ tamaā namecŭmaxŭ.

⁸ Rū yemaācŭ pemaā namecŭma ga Tupana. Rū yemacèx penayaxu ga maxŭ i taguma gŭxŭ yerŭ peyaxōgŭ. Rū ngēma maxŭ rŭ taxucŭrŭwama pegŭnatama penaxā, natŭrŭ Tupana nixŭ ga pexna naxāmarecŭ ga yema.

⁹ Rū tama űacŭ i mexŭ i pexŭxŭgagu nixŭ i pexŭ nangēxmaxŭ i ngēma maxŭ, natŭrŭ Tupana nixŭ ya pexna naxāmarecŭ na ngēmaācŭ taxŭema tŭgŭ icuèxŭxŭcèx.

¹⁰ Rū Tupana nixŭ ga tŭxŭ maxēxēēcŭ. Rū ñuxma rŭ tŭxŭ nangēxma i ngēma maxŭ yerŭ Ngechuchu ya Cristu tórŭ pecaducèx nayu. Rū Tupana tŭxna nanaxā i ngēma maxŭ na meā imaxēxŭcèx rŭ mexŭ ixŭgŭxŭcèx. Rū yemaācŭ tŭxŭ narŭngŭxēē ga Tupana yerŭ woetama nuxcŭmaxŭchima marŭ yemagu narŭxŭnŭ.

Cristu nixŭ ya yigŭmaā tŭxŭ rŭngŭxmŭēxēēcŭ

¹¹⁻¹² Rū ngēmacèx i pema na tama Yudŭgŭ pixŭgŭxŭ, rŭ name nixŭ i nŭxna pecuèxāchie na tama toxrŭŭ na pixŭgŭxŭ ga noxri rŭ tama Tupanaxŭ na pecuèxgŭxŭ. Rū yema na tama toxrŭŭ pixŭgŭxŭ rŭ yemacèx ga toma ga Yudŭgŭ i togŭ na Ítawiechèxmŭpēxechiraŭgŭxŭ, rŭ nŭxŭ tixugŭe na pema rŭ tama Tupanapēxewa na pimexŭ yerŭ

tama toxrūū pegü ípewiechèxmüpèxechiraūgü. Rū yexguma ga pema rü tama Cristuxū pecuèxgü, yerü tama Tupanaärü duūxūgü i Yudíugütanūxū pixīgü. Rū tama nūxū pecuèxgü ga Tupana núma na namuxū ga Nane na duūxūgüarü pecaducèx nayuxücèx na nūxna naxāāxücèx i maxū i taguma gúxū. Rū woo ga yema mexūgü ga Yudíugümaā inaxunetaxū ga Tupana, rü taxucürüwa penayaxu. Yerü ñoma ga naānewa rü pemaxēmare, rü tama nūxū pecuèx ga tacü chi pexū na üpetūxū ga yexguma chi peyuegu yerü tama Tupanaxū pecuèx.

¹³ Natürü woo ga noxri rü tama Tupanaxū na pecuáxū, natürü i ñuxma rü nügüxütawa pexū nagagü. Rū Ngechuchu ya Cristuarü duūxūgü pixīgü yerü pexcèx nayu rü nagü inanaba.

¹⁴⁻¹⁵ Rū ñuxma rü Cristu nixī ya tūxū rüngüxmüèxēcū. Rū noxri ga toma ga Yudíugü rü pexchi taxaie yerü tama toxrūū Yudíugü pixīgü. Natürü i ñuxma rü Cristu marü yigümaā tūxū narüngüxmüèxē. Rū yemaācū wūxitama i duūxūgüxū tūxū nixīgüxē rü inayanaxoxē na yigüarü uwanü ixīgüxū. Rū yexguma nayuxgu ga Cristu rü tūxū ínanguxūxē na tama natüüwa iyexmagüxücèx ga yema nuxcūmaūgüxū ga mugü ga toma ga Yudíugü nagu taxīxū. Rū wūxitama i duūxūgü i ngexwacaxūxū tūxū nixīgüxē i toma i Yudíugü na tixīgüxū rü pema i tama Yudíugü na pixīgüxū. Rū yemaācū nanaxü na guxāma i yixema rü norü duūxūgü na ixīgüxücèx. Rū yemaācū yigümaā tūxū inarüngüxmüèxē.

¹⁶ Rū yexguma curuchagu nayuxgu ga Cristu, rü inayanaxoxē ga yigüchi na ixaie xū. Rū yemaācū

ga Cristu rü Tupanamaã tüxŭ inarüngŭx-müëxëë, rü wüxitama i duŭxŭgŭxŭ tüxŭ nixŭgŭxëë.

17 Rü yexguma Cristu núma ũxgu, rü taxcèx núma nanange ga ore ga mexŭ ga marü yigümaã rü Tupanamaã na rüngŭxmüëxŭ. Rü yema ore rü toxcèx nixŭ i toma i Yudŭgü ga toxira Tupanaxŭ na tacuáxŭ. Rü yema ore rü pexcèx rü ta nixŭ ga woo tama Tupanaxŭ na pecuëxgŭxŭ ga noxrix.

18 Rü ñuxma rü guxãma i yixema rü Cristugagu tüxŭ natauxcha na Tanatü ya Tupanana ingaicamagŭxŭ. Rü ngëmatama Naãë i Üünexŭ nixŭ i tüxŭ rüngŭxëëxŭ na nüxna ingaicamagŭxŭcèx ya Tanatü ya Tupana.

19 Rü ngëmacèx i pema rü woo tama Tupanaxŭ pecuëxgŭ ga noxrix, rü woo tama norü duŭxŭgŭ pixŭgŭ ga yexguma, natürü tama ngëmaãcü pixŭgŭ i ñuxmax. Erü ñuxma rü natanŭxŭ pixŭgŭ i guxŭma i ngëma duŭxŭgŭ i Tupanaärü ixŭgŭxŭ. Rü aixcüma Tupanaxãcügŭxŭchi pixŭgŭ i ñuxmax.

20-22 Guxãma i pema rü wüxi ya ĩpata ya mexŭne ya Tupana nawa maxŭne pixŭgŭ. Rü ngëma cementu i ladriyu naetügu nugŭxŭ, rü ngëma rü Tupanaärü ngüexŭgŭ ga imugŭxŭ rü norü orearü uruŭgŭ nixŭ. Rü yima ladriyu ya nüxirama cementuétüwa ixücuchicü rü Cristu nixŭ. Rü ngëma inanaxŭgŭ na naxüãxŭ ya guxŭnema ya yima ĩ. Rü düxwa ningü na wüxi ya tupauca ya taxŭne ya Cristugagu ünene na yŭxŭ. Rü ngëmaãcü i pema na Cristuarü pixŭgŭxŭ rü wüxigu tomaã peyan-guxëë ya wüxi ya tupauca ya taxŭne i ngextá Tupanaãë i Üünexŭ ímaxŭxŭwa.

3

*Tupana rü Pauruxü namu na ore i mexüxü yax-
uxü namaã ga yema duüxügü ga tama Yudíugü
ixíngüxü*

¹ Rü ñuxma na yemaãcü Tupana pexü rüngüxëxü, rü choma i Pauru rü pexcèx chayumüxë. Rü pemaã nüxü chixu rü núma poxcupataüwa changëxma erü Ngechuchu ya Cristuarü duüxü chixí. Rü nuxma chapoxcu erü guxüwama nüxü chixuchiga na pema rü ta pexü nangëxmaxü i pechica i Tupanaxütawa woo na tama Yudíugü pixíngüxü.

² Rü maneca marü nüxü pecuáchiga na ñuxãcü Tupana choxü nangechaüãcüma choxü muxü na pexü charüngüxëxüçèx rü pemaã nüxü chix-
uxüçèx i norü ore i mexü.

³ Rü Tupana chomaã nanangoxëë rü choxü nüxü nacuëxëë ga yema ore ga pechiga ga noxri nüxícatama nüxü nacuáxü. Rü yemachiga nixí ga írarüwa marü pexcèx chanaxümatüxü ga noxrix.

⁴ Rü yexguma pexcèx chanaxümatügu rü pemaã nüxü chixu ga yema noxri ëxüguxü ga ore i ñuxãcü Tupana rü Cristugagu duüxügüxü namaxëxëxü. Rü ngëxguma meã nawa pengüegu i ngëma popera rü tá nüxü pecuèx na aixcüma yíxü ga yema ore ga noxri ëxüguxü ga nachiga pexcèx chaxümatüxü.

⁵ Rü yema nixí ga ore ga ëxüguxü ga Tu-
pana taxüexüma meã nüxü nacuëxëëxü ga noxrix. Natürü i ñuxma rü ngëma Naãë i Üünexü rü marü nanangoxëë i ngëma ore naxcèx i Tupanaärü duüxügü i üünexü i yamugüxü rü norü orearü uruügü.

⁶ Rū ñuxma rü tá pemaã nüxũ chixu i ñuxãcü na yĩxũ i ngẽma ore ga noxri êxũguxũ. Rū dücax, woo tama Yudíugü pixĩgü natürü i ñuxma rü pexcèx rü ta nixĩ i ngẽma maxũ i taguma gúxũ ga noxri Tupana tomaã ixunetaxũ. Rū ñuxma i pema rü ta norü duũxũgü pixĩgü. Rū pexcèx nixĩ i guxũma i ngẽma Tupanaãrũ unetagü ga noxri tomaã nüxũ yaxuxũ. Rū ngẽmaãcü i ñuxma rü Ngechuchu ya Cristugagu pexũ nangẽxma i guxũma i ngẽma mexũgü erü peyaxõgü i norü ore i tüxũ maxẽxẽxũ.

⁷ Rū woo taxuwama chame na chanaxũxücèx i norü puracü, natürü ya Tupana rü choxũ namuãma rü choxũ naporaxẽẽ na nüxũ chixuxücèx i ngẽma norü ore i mexũ.

⁸ Rū chaugücèx i Tupanapẽxewa rü choma nixĩ i guxũ i norü duũxũgüarũ ñaxtũwaama chaxũxũ. Rū woo ngẽmaãcü chixĩ, natürü Tupana choxũ nangechaũ rü choxna nanaxã i ngẽma puracü i mexũ na ngẽma tama Yudíugü ixĩgũxũmaã nüxũ na chixuxücèx i norü ore i mexũ na ñuxãcü namexẽchixũ rü taguma iyagúxũ ga yema taxcèx naxũxũ ga Cristu.

⁹ Rū nüma ga Tupana ya guxũãrũ üruũ ixĩcü, rü choxũ namu na guxũ i duũxũgũxũ nüxũ chacuèxẽxũcèx na ñuxãcü yĩxũ i ngẽma norü ngúchaũ ga nuxcüma êxũguxũ ga noxri nüxĩcatama nüxũ nacuáxũ. Rū ngẽma norü ngúchaũ nixĩ i Cristugagu tüxũ na namaxẽxẽxũ.

¹⁰ Rū yemaãcü choxũ namu ga Tupana na ngẽma duũxũgü i tama Yudíugü ixĩgũxũmaã nüxũ chixuxücèx i ore i mexũ na yaxõgüãxücèx. Rū nüma ya Tupana nanaxwèxe na yaxõgüãxũ

na ngēmaācū guxūma i āēxgacūgū i daxūcūāx nūxū nadaugūxūcèx na ñuxācū nūxū nacuèxūchixū ga Tupana ga yexguma duūxūgūaxū natauxchaxēēāgu na naxūtawa nangugūxūcèx.

11 Rū yemaācū nūxū nanatauxchaxēē ga Tupana yerū woetama nuxcūmaxūchima guxūguma nagu narūxīnū na tórū Cori ya Ngechuchu ya Cristugagu tá na namaxēxēēāxū i duūxūgū. Rū yemaācū nayanguxēē.

12 Rū ñuxma na Cristuarū duūxūgū ixīgūxū rū nūxū na yaxōgūxū, rū tūxū natauxcha na Tupanana ingaicamagūxū rū taxucèxma nūxū na imūēxū.

13 Rū ngēmacèx i ñuxma na pexcèx ngúxū chingexū rū pexū chacèxū na tama chauxcèx pexoegaēgūxūcèx. Erū ngēma ngúxū na chingexū i ñuxma rū perū meruū nixī i ngēma.

Cristu rū poraācū tūxū nangechañ

14 Rū ngēmacèx, ngēxguma nagu charūxīnūgu na ñuxācū Tanatū ya Tupana taxcèx namexēēxū na naxācūgū ixīgūxūcèx, rū napēxegu chacaxāpūxū na nūxū chicuèxūxūcèx.

15 Rū nūma nixī i Nanatū yīixū i guxūma i norū duūxūgū i ñoma i naānewa rū daxūguxū i naānewa ngēxmagūxū.

16 Rū Tanatū ya guxūguma poraācū tamaā mecūmacūna chaca na Naāē i Ūnēxūārū ngūxēēmaā pexū naporaexēēxūcèx na aixcūma peporaexūcèx i perū maxūwa.

17-18 Rū ngēxgumarūū ta nūxna naxcèx chaca na perū ōgagu pewa namaxūxūcèx ya Cristu. Rū ngēxguma ngēmaācū perū maxūwa peporaegu rū

pexŭ nangēxmagu i ngēma ngechaŭ i aixcūma ixīxŭ, rŭ tá wŭxigu guxŭma i yaxōgŭxŭmaã nŭxŭ pecuèx na ñuxācŭ nataxŭchixŭ i norŭ ngechaŭ i namaã tŭxŭ nangechaŭxŭ ya Cristu.

19 Rŭ woo tama yanguxgu i tórŭ cuèx na nŭxŭ icuáxŭcèx na nañuxraŭxŭ i ngēma ngechaŭ i namaã Cristu tŭxŭ ngechaŭxŭ, natŭrŭ Tupanana naxcèx chaca na pexcèx nangoxēēãxŭcèx na ñuxācŭ na yīxŭ i ngēma ngechaŭ na aixcūma pewa nangēxmaxŭ i guxŭma i Tupanacŭmagŭ.

20 Rŭ ñuxma rŭ name nixī i guxāma i yixema rŭ nŭxŭ ticuèxŭŭgŭ ya Tupana. Erŭ nŭma rŭ nŭxŭ nangēxma i pora na naxŭãxŭ i guxŭma i ngēma naxcèx líçaxŭ rŭ ēxna nagu rŭxīnŭēxŭārŭ yexeraxŭchi. Rŭ ngēma norŭ pora i tawa ngēxmaxŭmaã nixī i naxŭãxŭ i guxŭma i ngēma.

21 Rŭ ñuxma rŭ name nixī i guxŭma i norŭ duŭxŭgŭ i yaxōgŭxŭ rŭ guxŭgutáma Tupanaxŭ nicuèxŭŭgŭ naxcèx i ngēma Ngechuchu ya Cristu ŭxŭ. Rŭ ngēmaãcŭ yī.

4

Tupanaãē i Ūñexŭ rŭ wŭxigutama tŭxŭ narŭxīnŭēxēē

1 Rŭ ñuxma na ngēmaãcŭ Tupana tŭxŭ rŭngŭxŭēēxŭ, rŭ choma i Cristugagu na chapoxcuxŭ, rŭ pexŭ chacèèxŭ na Tupana naxwèxexŭãcŭma meã pemaxēxŭ. Rŭ name nixī i ngēmaãcŭ pemaxē erŭ pexŭ nixī ga nadexŭ ga Tupana, rŭ norŭ duŭxŭgŭ pixīgŭ i ñuxmax.

² Rū tama name i pegü picuèxüxügü. Rū name nixĩ i guxüguma pemecūmagü rü yaxna namaã pexĩnüë i togü rü nüxũ pengechaügü.

³ Rū chanaxwae i wüxigu perüxĩnüë rü ñoma wüxitama i duüxürüü pixĩgü erü pewa nangëxma i Tupanaãe i Üünexũ. Rū name nixĩ i naxcèx pedau na guxüguma pegü pengechaügüxũ rü ngëmaãcü taguma tacüçèx pegü pitoyexũ.

⁴ Erü yixema na Cristuarü duüxügü ixĩgüxũ, rü ñoma wüxitama i duüxürüü tixĩgü. Rū ngëxgumarüü ta wüxitama nixĩ i Naãe i Üünexũ i guxãwama maxüxũ. Rū ngëxgumarüü ta Tupana pexũ nade na guxãma ípenanguxëëgüxüçèx i wüxitama i maxũ i taguma gúxũ.

⁵ Rū wüxitama nixĩ ya tórü Cori, rü wüxiaxütama nixĩ i yaxögüxũ rü wüxicèxicatama nixĩ ga íbaiüxũ ga guxãma.

⁶ Rū wüxitama nixĩ ya Tupana ya guxãnatü ixĩcü. Rū nüma rü guxãetüwama nangëxma rü guxãwama namaxũ. Rū nüma rü guxãxũ narüngüxëë na tanaxüxüçèx i norü puracü.

⁷ Natürü wüxichigü i yixema rü tanayaxu i ngëma nacüma rü ngëma cuèx i Cristu tüxna ãmarechaüxũ na naxügüxüçèx i norü puracü.

⁸ Rū ngëmacèx i Tupanaärü ore i ümatüxüwa rü ñanagürü:

“Rü yexguma daxügüxũ ga naãnewa naxüxgu, rü yema tüxũ nagagü ga guxema marü tüxũ ínanguxüxëë nawa ga tümaarü chixexũ. Rū norü duüxügüna nanaxã ga cuèx na ngema-maã Tupanaarü puracü naxügüxüçèx”,
ñanagürü i ngëma ore.

9 Rū ñuxma Pa Chaueneëgüx, rü pexna chaca, rü çtacüchiga nixĩ i ngẽma ore i ñaxũ, “Daxũwa naxũ”, ñaxũ? Rū dücax, ngẽmawa nüxũ tacuèx ga noxri rü ñoma ga naãnegu na ínaxĩxũ ga nümax.

10 Rū gumatama Cristu ga ñoma ga naãnegu íruxĩcü, rü gumatama nixĩ ga daxũguxũ i naãne i Tupana íngẽxmaxũwa üxcü na guxãëtüwa nangẽxmaxüçèx rü guxüwama nangẽxmaxüçèx.

11 Rū nümatama nixĩ ga guxema norü duüxëgüna naxããxũ ga tümaãrü cuèx rü tümaãrü puracü. Rü tüxũ naxuneta ga ñuxre na toxnamana norü orexũ tayarüxugüxüçèx. Rü toguegü rü tüxna nanaxã ga cuèx na duüxügümaã nüxũ tixuxüçèx i ngema norü ore i tüxũ nüxũ nacuèxëëxũ. Rü toguegü rü tüxna nanaxã ga cuèx na duüxügüaxũ tanangúchaüxëëxũ i Tupanaarü ore na yaxögüãxüçèx. Rü toguegü rü tüxna nanaxã ga cuèx na ngema yaxögüxüarü dauruxügü tixĩgüxüçèx. Rü toguegü rü tüxna nanaxã ga cuèx na norü oremaã tangúexëëtaegüxüçèx.

12 Rü yemaãcü norü duüxëgüna nanaxã ga tümaãrü puracü rü tümamaã inananguxüxëë na ngẽma yaxögüxüxũ tarüngüxëëgüxüçèx na ngẽmaãcü guxüma i ngẽma yaxögüxü rü yexeraãcü nüxũ yacuáetanüxüçèx i norü ore.

13 Rü Cristu nanaxwèxe na ngẽma norü orewa iyaetanüxũ i guxãma i yixema ñuxmatáta wüxigu aixcüma meã yaxögü rü meã nüxũ icuèxgü ya Tupana Nane. Rü ngẽmaãcü tá düxwa nawa tangugü na aixcüma Tupana naxwèxexüãcüma ixĩgüxũ, rü tá tiyaetanü i norü orewa ñuxmatáta ñoma Cristu ya aixcüma mexëchicürüü ixĩgü.

14 Rū tāūtáma ñoma buxügürüü tixīgü i tórü maxūwa. Erü ngēma buxügü rü tauxchaācü toguama narüxīnūē. Rū ngēxguma tacü rü to i nguxēētaexū naxīnūēgu rü ngēmawe narüxī ñuxmata naga naxīnūē i ngēma duūxügü i chixexū i norü doramaã nawomüxēēgüxū rü nachixexēēgüchaūxū. Natürü i yixema rü tama name na ngēxgumarüü ixīgüxū.

15 Rū name nixī i yigü ingechaūgüācūma nagu taxī i ngēma ore i aixcūma ixīxū, na ngēmaācü yexeraācü naxrūü ixīgüxūcèx ya Cristu ya guxūma i yaxōgüxūārü āēxgacü ixīcü.

16 Rū taeru ya Cristuwa nixī i ne naxūxū i tórü pora na naxcèx imaxēxūcèx. Rū guxāma i yixema rü wüxigu naxmēxwa tangēxmagü. Rū ngēxguma Cristugagu meã wüxigu ipuracüegu rü yigü rüngüxēēgu rü guxūma meãma inixū. Rū ngēmaācü yigü ingechaūgüācūma norü orewa tiyaetanü na düxwa nūma nanaxwèxexūācūma ixīgüxūcèx.

Maxū i ngexwacaxūxū i Cristugagu tüxū ngēxmaxū

17 Rū ñuxma rü Cristuégagu pexū chaxucuxē na tama nagu pexīxū i ngēma chixexū ga noxri nagu pexīxū ga yexguma tauta Cristuaxū peyaxōgügu. Rū tama name i nagu pexī i nacūmagü i ngēma duūxügü i tama Tupanaxū cuèxgüxū i naēchitamare maxēxū.

18 Erü Chataná rü nanatoōēgü i ngēma duūxügü, rü ngēmacèx chixexūguxicatama narüxīnūē. Rū nagagugütama nüxū nataxuma i maxū i

taguma gúxŭ i Tupanawa ne ŭxŭ, erŭ tama nŭxŭ nacuèxgŭchaŭ.

19 Rŭ tama naxãneē na tacŭ rŭ chixexŭ na naxŭgŭxŭ, rŭ ngēmacèx nagu naxĩ rŭ nŭxŭ namepua i guxŭraŭxŭ i chixexŭgŭ na naxŭgŭxŭ.

20 Natŭrŭ i pema rŭ tama ngēmaãcŭ na pemaxèxŭcèx nixĩ i Cristuaxŭ peyaxŭgŭxŭ.

21 Yerŭ pema rŭ marŭ meã nŭxŭ pexĩnŭē ga Cristuchiga. Rŭ toxŭtawa naxcèx pengŭe, rŭ nŭxŭ pecuèx i norŭ ore i aixcŭma ixĩxŭ na ñuxãcŭ Ngechuchu naxwèxexŭãcŭma na pemaxèxŭ.

22 Rŭ ngēmacèx name nixĩ i nŭxŭ perŭxoe i ngēma nuxcŭmaŭxŭ i pecŭmagŭ ga ŭpa nagu pexĩxŭ. Yerŭ yema nuxcŭmaŭxŭ ga perŭ maxŭ rŭ nachixexŭchi. Rŭ pexŭ napora rŭ pexŭ nawomŭxèēgŭ na nagu pexĩxŭcèx ga yema pexeneãrŭ ngŭchaŭgŭ i tama mexŭ. Natŭrŭ i ñuxma rŭ name nixĩ i nŭxŭ perŭxoe i guxŭma i ngēma.

23 Rŭ ngēmacèx i ñuxma na Cristuarŭ duŭxŭgŭ pixĩgŭxŭ rŭ name nixĩ na Tupanaguxicatama perŭxĩnŭēxŭ. Rŭ name nixĩ i Tupanana pegŭ pexãgŭ na Naãē i Ūŭnexŭ pewa puracŭxŭcèx rŭ na nangexwacaxŭxèēãxŭcèx i peãē.

24 Rŭ name nixĩ i penayaxu i ngexwacaxŭxŭ i pecŭma i Tupana norŭ ngŭchaŭmaã pexcèx mexèēxŭ. Rŭ ngēma nacŭma i ngexwacaxŭxŭ rŭ perŭ maxŭ i mexŭwa tá nangox i ngēxguma nagu pexĩxgu i ngēma ore i aixcŭma ixĩxŭ rŭ tama nawe perŭxĩxgu i pexeneãrŭ ngŭchaŭ.

25 Rŭ ngēmacèx i ñuxma na Cristuarŭ pixĩgŭxŭ rŭ tama name na pidoratèèxgŭxŭ. Natŭrŭ name nixĩ i wŭxichigŭ rŭ tŭmamŭcŭmaã aixcŭmaxŭ tixu. Erŭ

guxãma i yixema rü yigütanüxŭ i yaxõgüxŭ tixĩgü.

26 Rŭ ngëxguma texé tacü peãëwa nguxëëgu rü ꞑpegüna pedaugü na tama pecadu pexüxüçèx! Rŭ tama name i nagu perüxĩnüëëcha natürü name nixĩ i paxa ngëmatama i ngunexügu nüxŭ ipeyarüngüma i ngëma naxüpa na yanaxücuxŭ ya üèxcü.

27 Rŭ pegüna pedaugü na tama penaxüchicaxüçèx i Chataná na ngëmaãcü nayoxniëxüçèx rü pemaã inacuáxüçèx.

28 Rŭ ngëxguma texé petanüwa ngítèëxgu ga üpa, rü name nixĩ i nüxŭ tarüxo i ngëma. Rŭ name nixĩ i tümamëxëmaã meã tapuracü na ngëmaãcü tüxŭ nangëxmaxüçèx i tümaãrŭ ngëmaxŭ na toguãx ya tüxŭ nataxüemaã tangauxüçèx.

29 Rŭ tama name i chixexŭ i oremaã pidexagü. Rŭ name nixĩ i ore i mexümaã pidexagü na ngëmaãcü ngëma duüxügü i pexŭ inüëxüxŭ perüngüxëëgüxüçèx na yexeraãcü Tupanaga naxĩnüëxüçèx rü nataãëgüxüçèx.

30 ꞑRŭ pexuãëgü na tama penangechaüxëëxüçèx i Tupanaãë i Üünexŭ! Erü ngëma Naãë i Üünexŭ nixĩ i Tupana pexna muxŭ na nüxŭ pecuáxüçèx na aixcüma norü duüxügü pixĩgüxŭ ñuxmatáta ngëma ngunexŭ i nagu pexcèx núma naxüxŭ ya Cristu.

31 ꞑRŭ nüxŭ perüxoe na nagu perüxĩnüëëchaxŭ ega texé tacü rü chixexŭ pemaã üxgux! Rŭ ngëxgumarü ta name nixĩ na nüxŭ perüxoexŭ na aigu perüxinüëxŭ, rü ëxna penuëxŭ, rü ëxna pegü na pengaxŭ, rü ëxna peguxchigawëxegüxŭ. Rŭ ngëmaãcü name nixĩ na nüxŭ perüxoexŭ i guxüma i ngëma chixexŭ i dexagü.

32 Rū name nixĩ i pegü perüngüxēēgü rü pegümaã pemecümagü, rü pegüxũ pengechaũtümüügü i wüxichigü. Rū ngëxguma petanüwa texé tacü rü chixexũ pemaã üxgux, rü name nixĩ i pegüxũ nüxũ pengechaũgü i wüxichigü yema na Cristugagu Tupana pexũ nüxũ nangechaũxürü.

5

Name nixĩ i meã namaxē i Tupanaxãcügü

1 Rū ñuxma rü Tupanaxãcügü ya pexũ nangechaũgüxe pixĩgü. Rū ngëmacèx name nixĩ i naxcèx pedau na naxrüü meã pemaxëxũ rü naxrüü pimexũ.

2 Rū name nixĩ i pegü pengechaũgü yema Cristu tüxũ na ngechaũxürü. Rū nüma rü taxcèx nügü inaxã rü taxcèx nayu. Rū yemaãcü Tupanaxũ nataãëxëë yerü yemaãcü tüxũ namaxëxëë.

3 Rū ñuxma rü Tupanaãrü duüxügü pixĩgü. Rū ngëmacèx tama name i naĩ i ngemaã rü ëxna naĩ ya yatümaã na ipepexũ. Rū tama name na pexeneãrü ngüchaũwe perüxixũ rü ëxna pegüna penanugüchaũxũ i tacü i ngëmaxügü. Rū ngëmacèx name nixĩ i nüxũ perüxoe i guxüma i ngëma chixexügü, rü bai i nachiga na pidexagümarexũ.

4 Rū tama name i tacü rü ore i ãũãchixüxũ pixu, rü bai i tacü rü ngeãëxümare pixu, rü bai i texëxũ pecugücüraxũ. Erü ngëma ore i chixexügü rü taxuwama name. Rū narümemaë nixĩ i Tupanana moxë pexãgü.

5 Rū aixcüma pemaã nüxũ chixu rü ngëxguma texé naĩ i ngemaã rü ëxna naĩ ya yatümaã

ipexgu, rü ěxna tūmaxŭneārü ngúchaŭ taxŭxgu, rü taxucŭrŭwama taxāchica i ngextá tórü Cori ya Cristu rü Tanatŭ ya Tupana āěxgacŭ íixŭtŭwa. Rŭ ngĕxgumarŭŭ ta taxucŭrŭwama texé ngĕma taxāchica ega tŭgŭna tananugŭchaŭxgu i tacŭ rŭ ngĕmaxŭgŭ. Erŭ yíxema ngĕma nacŭma tŭxŭ ngĕxmaxĕ rŭ dŭxwa namaā tatupanaāx i ngĕma nacŭma i chixexŭ.

⁶ Rŭ tama naga pexŭnŭĕ ega texé tacŭ rŭ ore i ngĕāemarexŭmaā pexŭ womŭxĕĕchaŭgu na penaxŭxŭcĕx i ngĕma chixexŭgŭ! Erŭ ngĕma chixexŭgŭgagu nixŭ i Tupana tá poraācŭ napoxcuexŭ i ngĕma duŭxŭgŭ i tama naga ŭnŭĕxŭ.

⁷ Rŭ ngĕmacĕx tama name i ngĕma duŭxŭgŭmaā pexāmŭcŭgŭ na pema rŭ ta tama penaxŭxŭcĕx i ngĕma chixexŭgŭ.

⁸ Rŭ ŭpa ga pema rŭ ĕānexŭwa peyexmagŭ, yerŭ tama Tupanaxŭ pecuĕx rŭ chixri pemaxĕ. Natŭrŭ i ŭuxma na Tupanaxŭ pecuáxŭ rŭ tórü Coriarŭ duŭxŭgŭ na pixŭgŭxŭ, rŭ ngóonexŭwa pengĕxmagŭ. Rŭ ngĕmacĕx name nixŭ i duŭxŭgŭ i ngóonexŭwa ngĕxmagŭxŭrŭŭ meā na pemaxĕxŭ.

⁹ Erŭ ngĕxguma ngóonexŭwa ingĕxmagu, rŭ mexŭ taxŭgŭ, rŭ nagu taxŭ i ore i aixcŭma ixŭxŭ, rŭ meā tamaxĕ.

¹⁰ Rŭ ngĕmacĕx name nixŭ i naxcĕx pedau na nagu pexŭxŭ i ngĕma maxŭ i tórü Cori namaā taāxŭ.

¹¹ Rŭ tama name i pema rŭ ta penaxŭ i ngĕma chixexŭgŭ i taxuwama mexŭ i ngĕma togŭ i duŭxŭgŭ i ĕānexŭwa ngĕxmagŭxŭ ŭgŭxŭ. Natŭrŭ narŭmemaĕ nixŭ i penangoxĕĕ na nachixexŭ i ngĕma naxŭgŭxŭ.

12 Erü ngēma chixexŭ i cúācūma naxügŭxŭ i ngēma yatügŭ rŭ ngexŭgŭ, rŭ woo nachiga idex-agŭmaregu rŭ wŭxi i ānexŭchi nixī.

13 Natŭrŭ ngēxguma ngóonexŭ nagu baxigu i ŭacŭ rŭ chixexŭgŭ rŭ meā tá nangox na ñuxācŭ nachixexŭ.

14 Erü guxŭma i ŭacŭ i ngēxmaxŭ, rŭ ngēxguma ngóonexŭwa nangēxmagu, rŭ meāma nangox na ñuxācŭ yīxŭ. Rŭ ngēmacèx i Tupanaärŭ orewa rŭ ñanagŭrŭ:

“¡Nabaixāchi i cuma na cupexŭ! ¡Rŭ írŭda i cuma na icuyarŭtaxuxŭ! ¡Rŭ nagu rŭxīnŭ na ñuxācŭ nachixexŭ i ngēma curŭ pecadugŭ! Rŭ Cristu tá cuxcèx nanangóonexēē rŭ tá cuxŭ narŭngŭxēē na Tupanaxŭ cucuáxŭcèx”,

ñanagŭrŭ i ngēma ore.

15 Rŭ ngēmacèx name nixī i pexuāēgŭ rŭ meā pemaxē. Rŭ tama name i ngēma duŭxŭgŭ i tama Tupanaärŭ orexŭ cuèxgŭxŭrŭrŭācūma na pemaxēxŭ, natŭrŭ name na duŭxŭgŭ i meā Tupanaga ĩnŭēxŭrŭrŭ meā na pemaxēxŭ.

16 Rŭ ñuxma na Tupana pexŭ yatauxchaāchixēēxŭ rŭ ¡pepaxāēgŭ na nŭxŭ pepuracŭexŭ rŭ penaxŭxŭ i ngēma nŭma nanaxwèxexŭ! Erü ñomaŭcŭi i duŭxŭgŭ rŭ poraācŭ chixexŭ naxŭgŭ.

17 Rŭ ñuxma na ngēmaācŭ namaxēxŭ i togŭ i duŭxŭgŭ, rŭ tama name na naxrŭŭ pixīgŭxŭ. Rŭ tama name i duŭxŭgŭ i ngēāēmarexŭrŭrŭ pixīgŭ. Natŭrŭ name nixī i Tupanaärŭ orewa pengúe na nŭxŭ pecuáxŭcèx i ŭacŭ na yīxŭ i tórŭ Cori pexŭ naxwèxexŭ na penaxŭxŭ.

18 Rŭ tama name i ŭacŭ rŭ axexŭ i ngúchixáxŭmaā pengāxē, erü ngēma rŭ chixexŭ tŭxŭ naxŭxēē i

ngēxguma ngēmaācū imaxēgu. Natürü name nixī i Tupanaāē i Üünexūna pegü pexāgü na pewa nangēxmaxūcèx rü pemaā inacuáxūcèx.

¹⁹ Rü name nixī i Tupanaārü orechigagu rü norü wiyægügu pegümaā pidexagü rü pegümaā nüxū pixu. Rü name nixī i nagúxūraūxū i norü wiyægügu pewiyægü, na ngēmaācū guxūne ya perü maxūnemaā tórü Corixū picuèxūügūxūcèx.

²⁰ Rü name nixī i guxūguma tórü Cori ya Ngechuchu ya Cristuégagu moxē nüxna pexāgü ya Tanatü ya Tupana naxcèx i guxūma.

Nūxācū meā nūgūmaā namaxē i wūxi ya ĩpatacūāx i Cristuaxū yaxōgūxū

²¹ Rü nūxma na Cristumēxēwa pengēxmagūxū, rü name nixī i pegūga pexīnūē i wūxichigü, erü Cristuxū pengechaūgü rü naga pexīnūē.

²² Rü pemax, Pa Ngexūgūx, rü ngēma tórü Cori naxwèxexürüü rü name nixī na petega pexīnūēxū.

²³ Erü nūma ya yatü rü namèxēru nixī, ngēxgumarüü ya Cristu na guxūma i yaxōgūxūēru na yīxū. Rü nūmagü i yaxōgūxū rü Cristuxūne nixīgü rü nūma ya Cristu nixī i norü maxēxēēruü yīxū.

²⁴ Rü ngēxgumarüü na Cristuga naxīnūēxū i ngēma yaxōgūxū, rü ngēxgumarüü ta i ngexūgü rü name nixī na guxūguma natega naxīnūēxū.

²⁵ Rü name nixī i namèxū nangechaū ya yatü, yema Cristu guxāma ga yaxōgūxexū na nangechaūxürüü. Rü yema na tūxū nangechaūxūcèx nixī ga nayuxū ga Cristu.

²⁶ Rü yemaācū nanaxü ga Cristu na nūgūxū tūxū nadexūcèx rü tūxū yaxūünexēēxūcèx i guxāma

i yixema na yaxōgūxū. Rū norū oremaã rū ngēma dexá i nawa íbaiūxūmaã tūxū nimexēē na aixcūma napēxewa imexūcèx.

²⁷ Rū yemaãcū tūxū nimexēē na nūgūtama tūxū nawéxūcèx na aixcūma guxūwama imexū rū na nataxuxūma i tacū i tórū chixexū rū bai i írarūwa i ngēxguma napēxewa ingugūgu. Erū tūxū nade na ixūūnegūxūcèx rū guxūwama imexūcèx i napēxewa.

²⁸ Rū yema Cristu tūxū na ngechaūxūrūū, rū wūxichigū ya yatū rū nanaxwèxe na namèxū nangechaūxū ñoma nūgūxūnexū na nangechaūxūrūūtama. Rū yíxema tūmamèxū ngechaūxē rū tūgūtama nixī i tangechaūxū.

²⁹ Erū tataxuma ya texé ya tūmaxūnechitama aixe, natūrū tanaxūwemū rū meãma nūxna tadau ngēma Cristu guxūma i yaxōgūxūna dauxūrūū.

³⁰ Rū guxāma i yixema na yaxōgūxū rū Cristu-tanūxū tixīgū rū ngēmaãcū wūxigu namūcūgū tixīgū. Rū nūma nixī i tūxna nadauxū.

³¹ Rū ngēmacèx i Tupanaārū ore i ūmatūxūwa rū ñanagūrū:

“Rū wūxichigū ya yatū rū nanatūna rū naēna tá nixūgachi na namèxmaã inaxāūxūcèx. Rū ngēma taxre rū wūxi tátama nixīgū”, ñanagūrū i ngēma ore.

³² Rū ngēma ore i yatūchiga rū namèxchiga rū wūxi i ore i aixcūma mexū nixī. Natūrū ñuxma na pemaã nūxū chixuxū i ngēma rū Cristuchiga rū yaxōgūxūchiga nixī i chidexaxū.

³³ Natūrū ngēma ore rū pechiga ta nixī. Rū ngēmacèx i wūxichigū i pema i yatūgū rū name nixī i pemèxū na pengechaūxū ngēma pegūtama

na pengechaũxũrũũ. Rũ ngẽxgumarũũ ta i pema i ngexũgũ rũ penaxwèxe i petega pexĩnũẽ.

6

¹ Pa Buxũgũx, ñuxma na Cristuarũ pixĩgũxũ, rũ name nixĩ i penatũga rũ peega pexĩnũẽ, erũ ngẽma nixĩ i aixcũma mexũ.

²⁻³ Yerũ yema mugũ ga Tupana Moĩchéna ãxũtanũwa rũ yema mu ga nũxĩra wũxi ga unetamaã Tupana nũxũ ixuxũ, rũ ñanagũrũ:

“¡Rũ tũxũ nangechaũ rũ tũxũ rũngũxẽẽ ya cunatũ rũ cue na aixcũma cutaãẽxũcèx rũ namáxũcèx i curũ maxũ i ñoma i naãnewa!” ñanagũrũ.

⁴ Rũ pemax, Pa Papágũ rũ Pa Mamágũx, rũ tama name i penangamare rũ penanuẽxẽẽ i pexacũgũ. Rũ name nixĩ i meã penayaexẽẽ, rũ peyaxucũxẽgũ rũ penangũexẽẽ na meã tórũ Coriaxũ yaxõgũãxũcèx.

⁵ Rũ pemagũ, Pa Duũxũgũ ya Ixããrũ Coriãxgũe, rũ name nixĩ i meã naga pexĩnũẽ i perũ corigũ i ñoma i naãnewa. Rũ penaxwèxe i nũxũ pengechaũgũãcũma rũ nũxũ pemuũẽãcũma meã naga pexĩnũẽ ñoma Cristuaxũ pepuracũexũrũũ.

⁶ Rũ tama name ega perũ corigũ pexũ dawenũguxicatama meã nũxũ pepuracũe na ngẽmaãcũ pemaã nataãẽxũcèx. Natũrũ ñuxma na Cristuarũ duũxũgũ pixĩgũxũ, rũ name nixĩ i guxũma i perũ ngũchaũmaã penaxũ i ngẽma Tupana pexũ naxwèxexũ.

⁷ Rũ ngẽma puracũ i perũ cori pexna ãxũ, rũ name nixĩ i petaãẽãcũma penaxũ, ñoma tórũ Cori

ya Ngechuchuaxŭ pepuracüexŭrŭŭ. Erü aixcüma nŭxŭ nixĩ i pepuracüexŭ rŭ tama i duŭxŭgüaxŭ.

⁸ Rŭ name nixĩ i ngẽmaãcŭ meã pepuracüe, erü nŭxŭ pecuèx rŭ wŭxichigŭ i duŭxŭ rŭ woo wŭxi i coriarŭ duŭxŭ yixĩgu rŭ ěxna taxúxearŭ yixĩgu, natŭrŭ tórŭ Cori ya Ngechuchu tá nŭxŭ nanaxŭtanŭ naxcèx i ngẽma mexŭ i naxŭxŭ.

⁹ Rŭ pemax, Pa Corigŭx, rŭ name nixĩ i ngẽxgumarŭŭ ta meã namaã pemaxẽ i perŭ duŭxŭgŭ. Rŭ tama name i tacŭ rŭ chixexŭmaã penaxãŭxŭne. Rŭ nŭxna pecuèxãchie na pema rŭ ta perŭ duŭxŭgŭrŭŭŭ tórŭ Cori ya daxŭgucŭmẽxẽwa na pengẽxmagŭxŭ. Rŭ aixcüma guxãma i yixema rŭ tawŭxigu i napẽxewa ya tórŭ Cori ya Cristu.

Cristuarŭ duŭxŭgŭarŭ poxŭruŭ i Tupana nŭxna ãxŭ na nŭgŭ namaã ñapoxŭgŭxŭcèx naxchaxwa i Chataná

¹⁰ Rŭ ñuxma na tórŭ Corimŭcŭgŭ pixĩgŭxŭ, Pa Chaueneẽgŭx, rŭ name nixĩ i pegŭ peporaexẽẽ na penayaxuxŭcèx i ngema pora i nawa ne ŭxŭ. Erü nŭma rŭ naporaxŭchi.

¹¹ ¡Rŭ pegŭ panaxŭ i guxŭma i ngema poxŭruŭgŭ i Tupana pexna ãxŭ na ngẽmamaã pegŭ ípepoxŭxŭcèx i ngẽxguma Chataná pexŭ womŭxẽẽchaŭgu!

¹² Erü tama duŭxŭgŭ i taxrŭŭ ãmachixŭ rŭ ãxchinaxãxŭmaã nixĩ i yigŭ idaixŭ. Natŭrŭ ngẽma namaã yigŭ idaixŭ nixĩ i Chatanáãrŭ duŭxŭgŭ i ngoxogŭ i chixexŭgŭ i poraexŭ. Rŭ nŭmagŭ rŭ namuxŭchi rŭ tŭxŭ narŭporamaẽgŭchaŭ. Rŭ tama nŭxŭ tadaugŭ erü naãẽgŭ nixĩ, natŭrŭ guxŭwama

nangëxmagü i ñoma i nañewa. Rü namaã inacuèx i ñoma i nañe i chixexü.

13 Rü ngëmacèx name nixĩ i penayauxgü i guxüma i ngëma poxüruüğü i Tupana pexna äxü, na ngëmaãcü pegü ípepoxüxcèx i ngëxguma ngëma naãëgü pexü nachixexeëchaügu. Rü ngëmaãcü tãütáma nüxü penguxü i ngëma naãëgü i chixexü rü tá nüxü perüporamaegü.

14 Rü ngemacèx name nixĩ i mea pegüna pedaugü na tama perü uwanümëxëgu peyixüxcèx. Rü penaxwae na pixaixcümagüxü na taxuwama nachixexüxcèx i perü maxü.

15 Rü name nixĩ i guxüguma ípememaregü na nüxü peyarüxugüxcèx i ngema ore i ngüxmüxëëroxü.

16 Rü ngema guxüarü yexera ixixü nixĩ na aixcüma Cristuaxü peyaxögüxü na ngëmaãcü pegü ípepoxüxcèx nüxna i Chatanáne i äücümaxü i namaã tüxü nachixexëëchaüxü.

17 Rü name nixĩ i penayaxu i ngema maxü i taguma gúxü na ngemamaã pegü ípepoxüxcèx ñoma wüxi i churara i napatëxemaã nügü ípoxüxürüxü. Rü ngema Tupanaarü Ore i Naãe i Üünexü pexna äxü, rü ngema nixĩ i pexne ixixü.

18 Rü tama name i nüxü perüchaue na peyumüxëgüxü. Natürü name nixĩ i guxüguma Tupanaãe i Üünexüarü ngüxëëmaã Tupanaxü pecèèxü. Rü penaxwae i pexuãe na taguma nüxü perüxoexüxcèx. Rü ngemaãcü name nixĩ i naxcèx peyumüxëgü i guxüma i Tupanaarü duüxügü.

19 Rü ngëxgumarüü ta chanaxwëxe i chauxcèx peyumüxëgü na Tupana choxü rüngüxëëxüxcèx rü choxna naxãaxüxcèx i ngëma ore i nüma

nanaxwèxexũ na nüxũ chixuxũ. Rü chanaxwèxe i Tupanana naxcèx peca na choxũ naporaxèẽxũcèx na tama chamuũãcũma nüxũ chixuxũcèx rü mea chanangoxèẽxũcèx i ngema norü ore i Cristuchiga ga noxri exũguxũ i ñuxma maxũ tüxna ãxũ.

²⁰ Rü ngẽma orexũ na chixuxũcèx nixĩ ga Tupana nügüchicüü choxũ inamuxũ. Rü ngẽmagagu nixĩ i chapoxcuxũ i ñuxmax. Rü chanaxwèxe i chauxcèx peyumüxègü na tama chamuũãcũma meãma nüma nanaxwèxexũãcũma nüxũ chixuxũcèx i ngẽma norü ore.

Pauru nanaguxèẽ ga norü popera rü wenaxãrũ yema duũxũgũxũ narümoxẽ

²¹ Rü taeneẽ ya nüxũ ingechaũcü ya Tíquicu, rü chauxrũũ aixcũma meãma napuracü i tórü Coriarü puracüwa. Rü nüma tá pemaã nüxũ nixu i guxũma i chauchiga na ñuxãcü choxũ naxüpetüxũ i nuã.

²² Rü ngẽmacèx nixĩ i pexũtawa chanamuxũ, na pemaã nüxũ yaxuxũcèx na ñuxãcü toxũ naxüpetüxũ, na ngẽmaãcü pexũ nataãèxèẽxũcèx.

²³ Pa Toeneègü i Yaxõgũxũx, chanaxwèxe i Tanatü ya Tupana rü tórü Cori ya Ngechuchu ya Cristu pexũ narü-ngũxèègü i guxãma i pema na meã pegümaã pemaxèxũcèx, rü aixcũma petaãègũxũcèx, rü pegü pengechaũgũxũcèx rü meã peyaxõgũxũcèx.

²⁴ Rü chanaxwèxe i Tanatü ya Tupana nüxũ narüngũxèè i guxũma i ngẽma duũxũgü i aixcũmaxũchi tórü Cori ya Ngechuchu ya Cristuxũ ngechaũgũxũ. Rü ngẽmaãcü yĩ.

Rü nuãma pexna,
Pauru

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6